

Poetas: Giuseppe Porcu - Bruno Agus - Salvatore Scanu TONARA

ESORDIU

1. Porcu (53'')

Cumintzamus su poeticu impreu,
si como est prontu dogni ascultadore,
Tonara mi est gioia e m'est recreu
a tenner'oe a tie in bonumore,
improvisende pro rendere onore
a su poeta Pippinu Mereu,
mastru in rima e vostru paesanu
e agradesside un'istrinta `e manu.

2. Agus (1' 02'')

Tonara c'at passadu calchi eranu,
chi guasi non mi nd'amento tantu,
cand'in sa festa `e Antoni padovanu
m'as iscultadu cust'umile cantu.
Oe già non si festat unu santu
ma unu poeta fizu `e paesanu,
e amentende cussu mastru `e rima
saludo a bois totu cun istima.

3. Scanu (1' 01'')

Tra totu sos poetas ch'ana iscritu,
Mereu est su meu preferidu,
e pro cussu Tonara cust'invitu
l'apo cuntentu che, pasc'arretzidu,
proite custu fizu beneitu
ti l'an sas noe musal favoridu.
E custa gara ponzende in caminu
saludo a totu a s'amentu `e Peppinu.

4. Porcu (36'')

Da chi in Tonara oe mi acato,
mi cumbenit cantende chi mi annote,
e cun rimas e versos mi riscato
isperende de mustrare sa dote.

M'at dumandadu ma po custu note
a cantare comente deo fato,
cun cust'umile modestu meu pannu
a onorare unu mastro gai mannu.

5. Agus

De cust'isula sarda in d'ogni via
lu giaman totu `e sos versos su re,
ma cussu onore no est sou ebbia
cussu Tonara el finas e pro te,
ca nd'at imortaladu a Galusè.
Imortaladu at sa idda nadìa,
sos boscos de castanzas e nutzolas
de custas bellas terras arestolas.

6. Scanu

De sa cultura sarda sos emblemas,
Mereu parte manna rapresentat,
ca de sos fizos sardos sos problemas
de los cumbatere cun sa musa tentat.
E gai cumbatende si turmentat
critichende ingiustos sos sistemas
e su populu custu fat'e profundu
l'at amentare cantu durat mundu.

7. Porcu

Certu de Sardigna su dolore,
descritu at Peppinu sena ingannu,
e contrariu teniat calchi mannu
chi de potere teniat valore.
Ma su sou dighu e mannu pannu
vidat su populu semper'in amore.
Certu piseddu mala sorte at tentu
ma biu eternu restas cun s'amentu.

8. Agus

Cun issu est sa sorte ingrata istàda
chi a l'at leadu in su menzus vigore,
ma tue Tonara teneli amore
ca issu l'at s'istima meritàda,
e in sa sua losa ilmentigàda
non li fetal mancare unu fiore.

E cand'est sicu su fiore sou
torradebilu a ponnere dae nou.

9. Scanu

Ma ia li sun rendende sos onores,
prite Tonara l'at istima neta
e gai in totu s'isula cumpleta
l'istiman totu mannos e minores.
Iscriende at tentu fama che poeta
però fit puru `e sos improvisadores.
Chi podiat cantare bi riflito
ite pecadu chi est mortu chito.

10. Porcu

Celtu est mortu a momentu importunu,
ed a giovànu sa vida at lassadu,
signu Deu l'at giamadu a radunu
ma tantu in cussos annos nos at dadu.
Ma in sa festa e su duamitzaeunu
sos poetas no adiana invitadu.
Deo cantende no ap'essere un'eroe
ma ispero su riscatu `e fagher oe.

11. Agus

Tenes rejone cando naral goi
Giuseppe e cunvintos sin de sunu,
però non neltzas ne ai ne oi
ca riscatadu ses custu comunu.
Su chi non an fatu in su duamitzaeunu
gia l'an fatu batorannos apoi
e isperamos como sena dannu
chi lu sigan a faghene dogniannu.

12. Scanu

E gai faghene chi potat Tonara,
de lamentare in dogni momentu,
cun sos poetas in cumbatimentu
subra su palcu abbelzende lara.
E i sa fama ch'in s'iscritu at tentu
chi tue Porcu l'apas in sa gara,
ca s'innaltzas cussa poesia
pones in festa sa tua Baronia.

13. Porcu

Sa fama mia non ch'est in isteddu
e dogni rima mia no est rara,
ma una oghe bo la canto iara
e non so bufonende in su faeddu.
In Othieri festa an fatu pro Cubeddu
fina in cue fatu non nde ana gara,
ma cando faghen gai mi addolòrana
chi antzis de onorare disonòrana.

14. Agus

Como c'a bol rispondere so custrintu
ca s'arrejonamentu est bell'e fissu.
Giuseppe Mereu si el distintu,
pro chi como che siat in s'abissu,
però 'e parte mia so cunvintu
chi tue as a fagher fama cant'e issu.
Ma chi sa morte ingrata e crua
non ti che led'a s'edade sua.

15. Scanu

Chi campet a chent'annos rie rie,
e s'esistenza chi l'apat godìla.
A Cubeddu an'amentadu in ie
e no ant fatu in su palcu s'isfida,
ma Porcu a lli legere sa vida
mi non fia isetende a tie.
Bi li s'apo nadu 'e coro sena ingannu
e ana promissu pro un'ater'annu.

16. Porcu

E tando de amitire cussu cres
ma Othieri no at uso indifferenzia
e si critico nde tenzas passenzia
ca cue non contades de sos res.
Bi atzis fatu una cunferenzia
e nan chi espertos bi nd'aian tres,
certu no an essent faeddadu male
ma atzis fatu sa peta sena sale.

17. Agus

Ma lassade su sale cun sas petas
c'andan bene postas in su bancu.
Sos chi faghene e cantan rimal netas
los dia cherrer semper'a fiancu.
in Gairo no bi at tentu poetas
ma pro cussu non los critican mancu,
ca in Gairo no er logu `e poesia
bi at sirvones e muvras ebbia.

18. Scanu

Porcu su sale che lu pontzal fora
ca forsis cussu est chi mancat a tie,
e non l'ofendas sa mia dimora
ca sos leones già bivini in ie.
Tue pigas a palcu rie rie
però leone no pares ancora,
e a bisu meu tando ilbaglias
si no das no mustres e iscaglias.

19. Porcu

Deo solu s'istrada mi addromo
e de gherra non ti fato un'intima,
ma cando conto de su falcu in chima
celtu calchi esempiu ti fentomo,
beru leones bind'aiat prima
ma sos cuniglios sun restados como,
chi artiglios non de tenene russos
e Iscanu pares tue unu e cussos.

20. Agus

Ja mi parides cun sas chistiones
chi che ponzet a sa conca in sa nue,
deo non fato cussos paragones
ca so semper'andende a pes a rue,
no est Giuseppe de cuddos leones
Iscanu ma no mi pares mancu tue,
ca pares unu pagu a dentes moddes
t'assimizas pius a sos groddes.

21. Scanu

No mi ponides in umore nieddu
s'in su palcu mi faghides cumpagnia,

no mi che chelzo pigare a s'sisteddu
mancu mi passat in sa fantasia.
Però pro mi papare unu porcheddu
m'at a bastare una dente ebbia
e creo note mala chi concluas
si como las impito in trintaduas.

22. Porcu

Si fogu ponimus cunvintu nde so
tando già lu sulamus cun su fodde,
Agus est nende Iscanu chi est modde
ma in cue bi acato un'imperò,
ca si lu paragonas a su grodde
perdet su pilu ma sas trassas no,
ma cun isfidas de custa manera
finas sas trassas peldet istasera.

23. Agus

Deo creo chi sas proas galanas
si fetan cun amore e allegrias,
sena misciare med'ateras lanas
improvisende bellas poesias,
deo no las chilco custal dentes mias
ma grascia a Deu jà las giuto sanas,
e no creo chi calchi conca `e zucca
mi nde ponzat solbidos in bucca.

24. Scanu

E ite Agus ti enit a sa mente
ca in su palcu gherran sos poetas,
e si est Porcu unu prepotente
no times a chi li timas a saetas,
invece tue in palcu lu rispetas
proite como t'est mesu parente,
però in dogni palcu ti ribella
ogache a fora custa parentela.

25. Porcu

Ma permiti ancora ti nde trate,
po narrer deo non so gherradore,
ed est mentzus inoghe chi mi acate
a Mereu po li rendere onore,

poi ancora in s'edade sò minore
e sas dentes la juto totu e late,
apo a fagher'isfidas colossales
cando bonos mi essin sos casciales.

26. Agus

A ti risponder'Isanu est un'obblìgu
totu pro su chi t'essit dae mente,
deo so un'omìne intelligente
e a nisciunu lu ponz'in castigu,
rispeto a issu da chi m'est parente
rispeto a tie ca mi ses amigu,
ca sa die chi cambio s'ideale
mi timo chi t'agatas mesu male.

27. Scanu

A totu cussu no do importanzia
si mi chilcas so des sos puntuales,
ca d'iat cherrer in dogni circostanzia
de custu tonu a dare sos signales,
ma Porcu na' chi est in s'isperanzia
chi li essan fortes sos casciales,
ma si sas musas no t'ana connotu
as a restare isdentigadu in totu.

28. Porcu

Pensa pro te in custa faina,
Isanu ti cunsizo cun valore,
e a Brunu no ponzas in dolore
nende chi de rispetu at farina
certu cun megus contat depitore
ca buscadu li apo sa femina,
si nono ancora fit bistadu in dolu
e fit restadu bajanu e solu.

29. Agus

Chi sias nende veridades no creo
ma agiumai mi pares atrividu,
deo sa vida mia mi la leo
coment'enit ca so sanu `e sentidu,
cando connotu sa femina apo deo
forsis tue no fis mancu naschidu,

papàdi ancora calchi macarrone
si nd'agatas o puru minestrone.

30. Scanu

Como no bos ponzedas a puntiglia,
e i sa copia ispero sia digna,
na chi l'at dadu su coro in cunsigna
e si potan amare a meraviglia,
duos poetas a b'aere in famiglia
est casu raru como in sa Sardigna,
ma sa natura fetat calchi ischerzu
e chi naschere bi potat su terzu.

31. Porcu

E si naschet abberu so cuntentu
chissà chi Deu lu apet mandadu,
po improvisare a bonu sentimentu
e cuntentende d'ogni populadu,
ma como namus a su comitadu
si tenet prontu a dare s'argumentu.
Isperende Mereu nos intendat
de su pagu chi amus no s'ofendat.

32. Agus

Si la finis serenu e siguru
cantende cun i laras su sorrisu,
ti ponzo fatu cunvintu e decisu
sen'andare mancu a man'in muru,
ma sò cunvintu dae paradisu
chi Mereu iscultende est isse puru.
E isperamos chi a cuss'istella
l'arrivet oe una gara bella.

33. Scanu

Si s'esordiu s'atit a finale,
a mie puru mi tocat de serrare.
Intantu Bruno est pensende a s'amare
e a s'afetu ch'est coniugale,
e gai pro su tres de nadale
cun s'isposa che pigat a s'altare.
Ma pro fagher sa festa piu rara
invites totu custos de Tonara.

PRIMU TEMA: SU GIOGU, SU TRIBAGLIU, S'ISTUDIU

1. Porcu

C'at bessidu in s'esordiu mele e crema,
de fronte como a minores e mannos,
prosighimus de gara su sistema
isperende de non bael dannos.
Deo cumpridu apo sol bint'annos
ma impicochidu gia mi at su tema,
prite sa sorte m'el nende in custu logu
chi a mie tocadu mi est su giogu

2. Agus

Si voluntade non mancat ne briu
sighimos custa gara in buonumore,
postu in mesu 'e Giuseppe e Salvatore
ca cun issos formamos custu triu.
E ia bol naro 'e su tema s'avìu
ca a mie mi tocat a ispremer suore,
no isco si ant fatu calch'isbagliu
m'a mie m'est tocadu su trabagliu

3. Scanu

Si el finidu su fingìdu atacu,
torrados semus totu in paghe santa,
ma tocat mover como ateru iscacu
de fronte a sa zente tota canta,
e na' chi Agus trabagliat che macu
e tue Porcu 'e su iogu ti anta,
e i s'istudiu invece custu die
pare ch'in tema apana dadu a mie.

4. Porcu

Motivu 'e non giogare non b'ind'ada
finas sol mannos mi ponene in chima,
cussos chi a s'isport li an' istima
si passan in allegria sa serada,
e finas custa gara improvisada
paret a mie unu giogu in rima.
Nos atacamus e isprimimus sa mente
totu po divertire custa zente.

5. Agus

Faghelu 'ene dogni gioghiteddu
ma pensade 'e sa vida su recreu,
in custa bella festa pro Mereu
chi ughel sabiu e lenu su chelveddu,
m'amento dae cando fio piseddu
su chi mi naraiat babbu meu:
mira e pitia sempre in d'ogni logu
bae e trabaglia e lassa su giogu.

6. Scanu

O Porcu ca ses intelligente
nara como sa santa veridade,
ca de su iogu no ses a edade
e a s'istudiu lu ses competente
e mai sel bistadu ripetente
ti ses iscritu a s'universidade.
Si che pones cultura in sa casceta
ti mezas finzas che poeta.

7. Porcu

Sena giogu su cantu el metzanu,
mancat de su cuncetu d'ogni fiore,
babu tuo at faeddadu cun valore
ma Brunu cussu tempus est lontanu,
pensa oe in s'istadu italianu
el gioghende ogni piseddu minore,
ma tue ses in d'un'istad'incivile
ue b'est su tribagliu minorile.

8. Agus

Ma su progressu el de sa fadiga,
non sial sempre in su giogu regoltu,
ca l'ischit tota custa zente amiga
ca su suore at fatu d'ogni portu,
finas pro tenner'una colcoriga
deo mi devo arare un'ortu,
ma tue lscanu pagu la cumbatis
ca cun s'studiu ti la dana gratis.

9. Scanu

E tue tando anda in d'ogni'arzola
e in su trabagliu ti ponzas a puntiglia,
ma fit Mereu una meraviglia

non fit cun sos chelveddol bola ola,
po tres annos andat a iscola
e istudiat in sol librol de famiglia,
e s'at fatu discreta una cultura
e gi at fatu una bella figura.

10. Porcu

Mereu nde aiat calidade
e celtu nde at mustradu poesia,
ma leade sa giovana edade
sa chi piul bella est sa pitzinnia.
Brunu tribagliende est in sa realtade
e deo olo cun sa fantasia.
Ti cumbenit a mie chi ti abbines
ca non tenzo lacanas ne confines.

11. Agus

Tue Iscanu si ti miro in cara
a voltal gia mi pares ispantadu,
finas como pro su chi mi al nadu
ma est sa veridade santa e giara,
ma cantal vias l'ana dedicadu
a cust'ecelsu poeta 'e Tonara,
ma sal vias chi si giaman Mereu
las an fatas cun su trabagliu meu.

12. Scanu

Dogn'unu s'antat sas suas rejonas
ca de cantare in gara como est s'ora,
o Porcu c'asa una oghe 'e signora
bi devel dare como atenziones,
ca in s'aula si b'at leziones
si olet sa mastra ti che ogat fora
no nde tenzal de iogu in fantasia
e a s'istudiu chi penzes ebbia.

13. Porcu

Nara s'istudiu chi el valorosu,
ma a lu narres permiti chi proveda,
non penses pro chi siat orgogliosu
chi a faca de Leopardi mi che seda,
bides cussu istudiadu fiat meda
e diventadu est totu gobbosu.
Da chi no at giogadu est totu unu misteru
chi si ch'el mortu da su disisperu

14. Agus

Sena trabagliu su mundu el baratu
e gia lu cheren in totu sal zonas.
Pensade pro sa gara it'est c'ant fatu
de Tonara sas animal bonas :
an costruidu unu bellu treatu
cun bellol muros e bellas poltronas,
cun d'unu bancu e unu palcu adatu
però cun su trabagliu an totu fatu.

15. Scanu

Ma s'ingegneri totu sol momentos
già guìdat d'ogni muradore
e s'istudiu mezorat sos talentos
e Leopardi si faghet onore.
Da s'istudiu ana fatu sos inventos
an' inventadu finas su motore.
Duncas s'iscola mia t'est amiga
finzas pro mi minare sa fadiga.

16. Porcu

Nades chi bois atzil manu santa
ma deo pius serenu apo s'isfogu,
amenta Brunu in s'italianu logu
cudda passada gherra 'e su baranta.
De su trabagliu sa disgrazia tanta
cantos piseddos leados a su giogu
e tantos pianghene oe a momentu
su giogu chi da tando no an tentu.

17. Agus

Ma ist'atentu non fetas inciampos
cun custu iogu ca pares addatu
in sas citades comente in sos campos
b'est semper su trabagliu su riscatu
pro su pallone t'an fatu sos campos
sos campol de su tennis t'an fatu
si su trabagliu mancat in tot'ue
creo chi gioghes pagu finas tue.

18. Scanu

In su trabagliu siet a s'ativos
in cantieris o in sa pinneta

ma in s'istudiu b'at mannol motivos
narrer bol devo sa veridade neta.
De s'istudiu cando nde fin privos
gia fit totu sa zente analfabeta,
invece como sol mannos e minores
totu coltos chi paren professores.

19. Porcu

Brunu a sa nave li at postu sa vela
nara s'istadiu at fatu totu a filu
non ti naro sa banga frundichèla
e su valore tou mustramìlu,
ma deo poto giogare in sa carrèla
finas cun d'una boza de pabilu.
A da chi a trabagliu non de faghel motu
si cherzo deo gia giogo etotu.

20. Agus

Tue mi unu pagu illusu mi pares
de su ghi no asa no ti nde onores
ca cuddos campioni esemplares
chi su pienande de totu sos onores,
giogana in sos campol regulares
cando b'intrant bintiduol giogadores,
foral de igue chi t'ispassel no creo
però in ie ia bi chelzo deo.

21. Scanu

E su tribagliu est giogu importante,
ca sos piseddol già deven sorriere,
però s'istudiu bi cheret costante
e a s'iscola si devene afiere,
ca sen'istudiu finamenta Dante
sa cumedia no podet iscrivere,
ma da s'iscola sel fatu profundu
l'ana onoradu in totu su mundu.

22. Porcu

E ogni versu sou fit che viola,
Dante de male no ata una taca
ma deo gioghende isto tichi taca
e contat custa parte mia sola,
e no acatas o Iscanu un'iscola
ue palestra non bin d'at a faca

ca si bi pensas tue pagu pagu
bi chelet semper unu pagu 'e isvagu.

23. Agus

O Iscanu collega 'e Othieri
ist'atentu a non perdere su filu,
Dante unu poeta furisteri
a lu connoschent finas in s'asilu,
ma cuddos chi an fatu su pabilu
cuddos chi t'ana dadu su tinteri,
ringrazialor sempre in d'ogni istante
si nono non ti legel mancu a Dante.

24. Scanu

E gai su trabagliu ses cantende
so cuntentu li faghes onore,
ma in s'istudiu ti naro improvisende
chi no ap'eo sa parte minore,
in d'ogni fabrica pensa cumandende
chi bias sempre unu direttore.
Cussu puru at fatu un'annu a iscola
no bi ponene un'ainu de mola.

25. Porcu

Ma su giogu cantade cun osanna,
ca contat su pius puru sentimentu,
finas cun paga cosa in patimentu
in su passadu no m'an dadu condanna,
da chi faghiana unu volaventu
e poi unu fusileddu 'e canna,
e sol boeddol de tricumuriscu
a torrare a cussu tempul bital friscu.

26. Agus

O Iscanu sa tua melodia
ia paret digna de totu sol vantos,
ma pro su direttore narrer chelia
no mi lu ponzas in mesu sos santos,
ca direttore bind'at unu ebbia
sos chi trabaglian invece sun tantos,
ca si lassana cussol de s'uffiziu
est istabilimentu pagu reeditziu.

27. Scanu

Dae su tribagliu si che cheren fuere
prite muiare no cheren s'ischina,
ma sigas a tribagliare e a construere
In d'ogni zona lontana e vicina.
Cuddos ch'istudian pro sa meighina
totu sol malel los cheren destruere,
e la onores cussa zente galana
cando sa zente ti la torran sana.

28. Porcu

Lea unu tenore pro cantare,
chi faghet giogol de d'ogni manera,
pois in discoteca zi s'ispera
cun sa lughes in cue an'a giogare,
opuru in s'aeronautica militare
gia giogan sos aereos in s'aera,
bidides custu tema tene zelu
dae sa terra finas a su chelu.

29. Agus

Cussos chi pro giogare sun addatos
a boltas in s'aera si bingrogana,
ca nde calan ca sun tropu distratos
ma sos cun su trabagliu chi s'isfogana,
amito cun s'aereo chi bi giogana
ma sos aereol mi chi cheren fatos.
Como pensende meda non ti straghes
ma cun su giogu tou it'est chi faghes.

30. Scanu

Cun su trabagliu sempre fissu,
non naro chi Bruno ti cundannas,
però su paragone nz'at amissu
menzul d'iscola intres in sal giannas,
ca da chi as fatu iscolal mannas
de tribagliu lezeru al su permissu,
e imparas tando a cumandare
chi el menzul meda e travagliare.

31. Porcu

Ma Brunu a sa sera est un'istratzu,
cando a torrare leada su caminu,
e Iscanu de s'istudiu in su latzu
tropu seriu lu tenet su destinu

Ma a su piseddu li dana un'andarinu
e li regalana unu pupatzu,
ed est gai chi a sa vida si aviat
ed el menzus su giogu chi bi siat.

32. Agus

Però chi gioghet solu su minore
no cando el mannu forte e final dotu.
Pensade da su trabagliu 'e su pastore
canta cosa ona amus connotu,
cuddu latte biancu e su regotu
su casu 'e pasta ona e de sapore.
Sos chi campana d'ogni cristianu
finas e cuddos cun sa pinna in manu.

33. scanu

Ma Porcu de iogare tenet gana
e faghene no li poto un'isfida.
Agus tribagliat puru tota chida
e dat bonos cumpensos sa matana,
ma s'istoria greca e sa romana
cosal medas insignat in sa vida,
e in su presente pro godere
su passadu tocat de l'ischire.

34. Porcu

Si cun sol grecos contal moe moe,
deo puru ti sigo in buonumore,
ca biel de su giogu su valore
e s'amentu si tramandat fin'a oe.
Da chi moriat mannu un'eroe
sol giogol li faghiana in onore.
Deo de ti lu narrer cunsidero
in s'Iliade no l'at nadu Omero.

35. Agus

O Iscanu cun sos chelveddos sanos
in d'ogni logu faghel gara digna,
ma cun s'istudiu chi as in cunsigna
non brinches a sos confinel lontanos,
ca sas primas istradal de Saldigna
Mi chi l'as an' apertas sol romanos
Chi su tribagliau aian' a fiancu
sena bisonzu 'e iscaldire su bancu.

36. Scanu

E cantol bellos chi seziis cantende
pro chi nisciunu no est presumidu.
Porcu che Agus si pesat fichidu
e già el meraviza improvisende,
ma totu custu chi mi sezil nende
nade comente chi l'azis ischidu.
Si sa mente no azis a s'iscuru
signu ch'istudiadel bois puru.

37. Porcu

Ma pensa chi Ulisse navighende,
a sol Feaces lu vid'arrivadu,
e chi vid'issu no aiat nadu
semper sas trassas sual fit tramende,
ma da chi in s'Olimpiade an giogadu
chi sa lanza lu an bidu tirende
si el distintu de sa zente in mesu
e chi fit mannu eroe ana cumpresu.

38. Agus

Za cumprendo sa ostra cantilena,
pro su trabagliu seziis in obligòs,
ma sos chi a issos istados sunu amigos
an'evolutu sa mente terrena
Amentade chi sos sardos antigos
sa Saldigna 'e nuragher l'an piena.
E in ie s'istudiu pagu podet regere
ca no ischian ne iscriere e ne legere.

39. Agus

Su grecu puru pariat addatu
a curren fatu de calchi pallone,
ma su trabagliu el bistadu gratu
in su tempul de Socrate e Platone.
Cand'in Atene s'Acropoli an fatu
e in s'Acropoli b'est su Partenone
chi parent fatol de manol de Deu
ma est totu frutu 'e su trabagliu meu.

40. Scanu

E gai cosal bellal de presentes,
de zeltu ia no adduras tristu,

ma de l'ischire si nde ses provistu
a Socrate e Platone e istudentes,
istudiana d'ogni die bene a mente
s'istudian puru pensa 'e Gesu Cristu.
Totu sol documentos chi ana in manu
istudiare lo deven fitianu.

41. Porcu

Istudiende no as'esser rue rue,
de sa cultura tenes sa corona,
ma sa fama 'e Pelè chest'in sa nue
o pensa puru a Riva e Maratona.
E su inare chi circolat in cue
pensade bene tando in d'ogni zona.
E istudiu e tribagliu cando mai
tenidel bois unu giru gai.

42. Agus

E ia bi ses andende gioga gioga
in chilca 'e alanzare sa corona.
Deo 'ia l'isco sa fama 'e Maradona
prima fit bella como el mesu groga.
Cando s'est istufadu in calchi zona
tando s'est postu a giogare cun sa droga.
Pro zente gai bi cheret su picu
oburu calchi fune pro s'impicu.

43. Scanu

Ma sos ch'aman su cultu cristianu,
an de sol libros sacros sol valores
e tue Porcu ti c'andas a lontanu
ca ses pensende a cussol giogadores.
Però amenta sos allenadores
chi andan'ogni tantu a Covercianu,
e istudiant tando a bonu coro
pro mezorare in su trabagliu issoro.

44. Porcu

Deo Brunu non bi fidu a dopiu
e ne bi fato una fine metzana,
e chi m'arrendas no lu penses propiu
ca s'arrejone ti chilco alcuna.
Sos chi a tie tribagliadu ana
sa droga po la faghel dae s'opiu,

e cussos sunu tristos sos produos
e gia si iden certol frutos tuos.

45. Agus

Tue debes essere mansuetu
si nono custu note inoghe dromo,
de custol fatol mios ti fentomo
calchi cosita ma in modu netu,
ca su trabagliu t'at fatu sa domo
ti at fatu una mesa e unu letu.
E cussu a i cussu certu male no li naras
inie ti riposas e riparas.

46. Scanu

Faghes tribagliol de ogni manera
e i su jogu puru ja dat resa,
ma su tema bellu cunsidera
chi l'apo deo e como lu pesa.
Prite si bos che ponene in galera
alzis bisonzu de una difesa
e a un'avocadu cumpetenzia
chi istudiadu at sa giurisprudenza.

47. Porcu

Ma già bi ses un'ora apedda apedda
a custu tema tou dende isfogu,
deo ti nde nalzo una in custu logu
e collega pius atentu fredda.
Da chi m'acato cun d'una pisedda
nalzo a issa faghimus calchi giogu,
ma Iscanu cosa gai non preferidi
e a lezere unu libru s'aperidi.

48. Agus

Non naro a chie giogat chi est canaglia
ma non li dao nemancu meritu.
Onoro final de Iscanu s'iscritu
però li naro inoghe travaglia,
ca sas piramides fatu an'in Egitu
e in Cina apan fatu una muraglia,
ma cheri'a ischire però in cale logu
azil bidu domol de su giogu.

49. Scanu

O Porcu sel gioghende in custa gara
ma Iscanu iscultes cust'istante,
prite bi faghes una figura mala
si cussa conca l'as tropu pesante.
Si s'abizat chi ses un'ignorante
si girat sa pisedda a s'ater'ala
e ti narat tando prontamente
no chelzo a cumpagnu unu molente.

50. Porcu

Deo de cussu no nde so se guru,
ma de finire s'ora est segua.
Unu istudiende cun bravura,
s'impignet pro si faghet su futuru,
e da chi manna tenet sa figura
unu bonu tribagliu tenzat puru,
ca est cussa sa parte agradessida
po godere tota canta sa vida.

51. Agus

Si ti paret chi fatu siet su tantu
ia la finimos e non pro puntiglia,
ma su trabagliu est chi a sa famiglia
li atit sa richesa e d'ogni antu.
Finas faghinde s'amore una pastiglia
bi cheret a boltas o unu quantu.
la sun' atretzos finas e addatos
però cun su trabagliu enint fatos.

52. Scanu

Chi non manchet su jogu e i s'ispannu
e chi trabagliene a manca e a dresta,
però sos istudentes in protesta
sun ca Moratti el fatende dannu.
Pro chi de ministru est a su pannu
gia sun pensende a li fagher sa festa,
ch'istudiare chelen cun consolu
e issa no los ponzat in dolu.

53. Scanu

Finas sa pedra ponen'a muntone,
sos chi faghen trabagliende movimientos,
ma in s'iscienza b'el d'ogni campione
chi faghet proa in totu sol momentos.

Sos chi istudiende sun sol bentos
prevedint s'uraganu e su ciclone.
Cun s'impignu chi ana postu in mente
in vida ana salvadu tanta zente.

54. Porcu

Ma su ciclone est una ruina
lu trasformat in mare unu lagu,
ma pensade su giogu chi el disvagu
e paret donu 'e sa manu divina.
Brunu operende est in sa Cina
tribagliat meda e lu pagan pagu.
A tie sa tristura ti appartenit
e menzus tando a giogare cumbenit.

55. Agus

Sos ciclonel gia sunu sempre ingratos
e gia non sunu celtu disizados,
però bi cheren sos trabaglios addatos
cussos terrores pro esser evitados,
ca cheren bene postos sos palatos
e gia cheren sol rios arginados.
Però pro fagher cussu ista seguru
bi cheret su trabagliu inie puru.

56. Scanu

E gai de su trabagliu coriola
e in sal manol no addural netu.
Ma belle gai o Agus ti consola
totu sa zente ti tenet rispetu,
ma amenta su chi faghet su progetu
cussa el zente chi at fatu iscola.
Custu in mente ti debes infligere
chi sena iscola non podel dirigere.

57. Porcu

Ma prite de s'istudiu mi nde trata
t'abizes chi no at tanta importanza,
cando in mesu 'e sol libros ti acatas
tropu el difficile in sa circostanzia,
mentres sas amicizial de s'infanzia
cussas chi gioghende si sun fatas,
sunu fortes e mai si trascurana
e pro tota sa vida cussal durana.

58. Agus

Deo no naro custu pro ilbagliu
ca so cunvintu 'e sa rejone mia.
Como s'Italia el mesu a s'ilbaragliu
disocupadol b'at in d'ogni via,
ma pro andare bene un'economia
ia tocat chi nde oghen de trabagliu.
Ca male andat cussu si no impastat
prite su giogu solu no ti bastat.

59. Agus

E tocat a Tremonti chi l'aprete
pro ch'istudiet a pemu recreu,
ma lass'ateru paragone fete
o Agus non t'at a parrer feu,
ca lea fin'a Peppinu Mereu
morit giovanu pro sa diabete,
ma istudiadu b'ana chena ingannos
e diabeticos campan' a chent'annos.

60. Porcu

Aberis a Parlamentu un'ispiragliu
tando deo non canto po disvagu,
a sos politicol li ponimus tragu
e cantende faghimus unu tagliu.
Paret istudiu nd'an chilcadu pagu
e pius pagu ne andat de tribagliu.
Mi pare guvernende in custu logu
sa politica s'an leadu a giogu.

61. Agus

Sa politica el bella e el fea
atit progressu e nol batit dannos,
ma sos istudiosos piul mannos
Iscanu a raru esempiu ti lor lea.
Ma b'indat in Casteddu barant'annos
Chi no l'il dan' una laurèa.
Gente gai che nd'at unu masone
chi cherian pro laurea unu marrone.

62. Scanu

Cussu a giogu creo ogni momentu
S'istudiu lu lean chena isfogu,

ma a Porcu li fato un'interrògu
e i su tema no est un'apentu.
Si che cheres pigare a Parlamentu
pensa a lassare chi debes su jogu.
Pro ti poder abberrer custa via
custu istudiu ia podet ebbìa.

63. Porcu

Ma de su tema meu t'impadroni,
chi Iscanu non che la finil male,
no lu naro s'istudiu lu remoni
ma a mie abberit su segnale.
Pensa chi finalmente a Berlusconi
furbu at fatu sa legge elettorale.
Su tema meu li faghet piaghene
totu est unu giogu de potere.

64. Agus

Ma Berlusconi no est anima neta
proite est chi Giuseppe t'avolotas.
E tue Iscanu comente non notas
ca pares una 'e sas animas eletas,
però giughides in sos pes sal botas
sos pantalones azis e gianchetas.
Però inoghe gia cheria ischire
chie bo l'at fatu cussu istire.

65. Scanu

In cue tue ja la tenel s'arte
e contat cun sa nostra sa fortuna,
ma custu jogu mi ponzas a parte
ca restas de fama a sa dijuna.
Cun s'istudi che pigant a sa luna
sun'istudiende pro pigare a Marte,
e s'ande bi pigare su recreu
amentade su meritu chi est su meu.

66. Porcu

Ma conto sempel deo pius abistu,
e in sol giogos conto de sos res,
Iskanu ca de istoiras ses provistu
cust'a mie amitire mi la des.
Su setichentos e setantases
prima de bi naschire Gesu Cristu

sa prima Olimpiade faghene in Atene
e totu el giogu si pensadel bene.

SEGUNDU TEMA

SA MUZERE, SU MARIDU E S'AMANTE

1. Porcu

De fronte a unu publicu gentile
Su tema nou ant batidu in sorte.
Deo interpretadu apo s'istile
e apo a tentare de li fagher corte.
Aparthenia a su sessu forte
e como mi ant passadu a su gentile.
Una muzere conto in cust'istante
ma so signora chi apo s'amante.

2. Agus

Lu sighimos a faghene su dovere
isperende in sas grascias de Deu.
Ma bos ringrazio pro su piaghene
chi m'azis dadu e pro su recreu,
ca sa idda 'e Peppinu Mereu
oe m'at regaladu una muzere.
A inoghe solu già so arrividu
e como diventadu so maridu.

3. Scanu

De custu tema chi m'ant postu in manu,
tocat ch'isterra su primu faeddu,
impignende sa limba e su cherveddu
proite in palcu no che so invanu.
In sa vida ja conto unu aianu
prit'in sa manu no giuto s'aneddu.
Ma non passo sa vida in penurìa
prite tenz' un'amante a compagnia.

4. Porcu

De massaia cun s'umile pannu,
casalinga già conto in s'abitu
e s'amore chi contat est beneitu

issu chi non mi atit mai dannu,
isposada mi so da calchi annu
ma istufada gia mi so subìtu
e mancu su diciu contat fatu in donu
chi pastu fatu a cambiù est piul bonu.

5. Agus

Deo so respetosu de sa dotrina,
pro chi dispretze calchi preideddu,
però dae cando fia giovaneddu
connotu apo tando a Giuseppina,
e in bidda in sa cheja divina
iscambiadu no s'amos s'aneddu.
Però como mi paret cust'isposa
chi s'est chilchende calch'atera cosa.

6. Scanu

No mi falat da oios su piantu
pro chi no tenza s'anima gemella,
prite bind'enit una d'ogni tantu
e faghimus in domo cumunella.
Si la idides già est un'incantu
est giovanedda e che rosa est bella,
poi mi at sa sorte favoridu
colcat cun megus e la campat su maridu.

7. Porcu

No idides chi canu est in testa,
no est betzu ma est quasi anzianu,
mentre deo so in su tempus giovanu
apo boria e allegria manifesta.
Bos cunfisso chi fia in d'una festa
apo connotu a Salvatore Iscanu,
e abbratzadu mi l'apo peldeu
e mai chi s'idat maridu meu.

8. Agus

As connotu un'omine de valore,
ma solu prima de ti coiuare.
Cando ti ses delvìda innamorare
mi daias totu su calore.
E amentadinde cando in cudd'altare
a mie m'as promissu eternu amore.
Ma como naro si non so distratu

de cuss'amore tou ite nd'as fatu.

9. Scanu

No isco in sa vida it'est fastizu
d'infatis mi la passo rie rie,
proit'est Zuseppina in contivitzu
e mi cheret bidere ogni die,
chi finas tentu amus unu fizu
est totu cantu assimizante a mie.
Ma su maridu pagu si fastizat
est mesu tontu mancu sind'abizat.

10. Porcu

Amante ti avelto: chi va là!
Paret chi ba! no istes sorridende
maridu meu at postu unu ma,
a mie paret chi est sospetende.
Su fitzu sou no l'est assimitzende
cheret s'esame 'e su DNA,
e si resessit in cuss'aconcada
timo t'assendat calchi fusilada.

11. Agus

It'at a narrer sa idda 'e Mereu
pro su chi oe a mie est capitadu,
ca sosorros in testa piantadu
m'ana cun su modu pius feu.
Ma l'ischis ca su dubbiu m'est passadu
chi unu fitzu no fit fitzu meu:
infati li naia a Giuseppina
custu paret de ratza molentina.

12. Scanu

Si est abberu chi mi as afetu
o Zuseppina faghemìlu ischire,
comente cando ti astringo in petu
chi cun megus pensas a godire.
Ma s'est abberu chi tenet suspetu
ja nos cumbenit a no che fuire.
No mi mancat de bene sa fortuna
e chi si nde chilchet issu un'ater'una.

13. Porcu

Ma no cumbenit a leare fua,

lassala cuss'idea in custou,
e maridu cambialu su prou
e d'ogni dubbiu tou como cua.
Deo ti juro in sa conca tua
chi su fizu chi amus est su tou:
est candidu e bellu che fiore
ed est frutu de su nostru amore.

14. Agus

Epuru ca ses s'anima gemella,
de unu chi at sa mente geniosa,
ma ti c'as postu sa conca in s'istella
ses viziada como e capricciosa.
Deo t'ap'ofridu una domo bella
e in domo mia ja b'at d'ogni cosa,
e como so timinde chi ti c'andas
cun d'unu chi no at mancu mudandas.

15. Scanu

E cando mai no mi das recreu,
e de continu mi cunfirmas s'amore,
ca su patire ja l'ischis ch'est feu
e fis cun issu in pena e dolore.
M'as cunfidadu calchi mese intreu
fis cun issu chena faghes s'amore.
As a narrer chi est intelligente
ma a bisu meu est mesu impotente

16. Porcu

Sa conca tua paret chi sia nua,
cun su maridu non nde fetas lota.
Deo cunfisso una domo l'apo connota
e cussa certu no la ponzo a cua,
meda già mi nd'at dadu peta cota
ma sempel pius paga est sa crua.
Mentre Iscanu conta conzu conzu
e mancu de viagra at bisonzu

17. Agus

Ma proite est chi andas tropu a fua
chilchende de mi ponner'in guai.
Custas faulas lassalas a cua
sa realtade l'ischis no est gai,
ca cuddu tantigheddu 'e peta crua

in domo ja no t'est mancada mai,
e si ti frimas o cara signora
su tantigheddu ja bi est ancora.

18. Scanu

E deo puru ja so persuasu
chi oramai ti tenzo in su coro,
chi a da chi no t'ido m'addoloro
e un'istante no llu passo in pasu,
ses de sa vida mia su tesoro
aiò Peppina e dammi unu asu,
e si maridu tou nos agatat
sosorros chi tenet si los ratat.

19. Porcu

Como t'abbratzo e non fato isbagliu,
sa via de s'amore mi la dromo.
Totu est sinceru su chi ti fentomo
de su coro t'abbelzo s'inspiragliu:
Is scanu fra un'ora beni a domo
chi Brunu at a bessire pro tribagliu.
Tue m'abbratzas in ancas e in petorru
e a issu li agiunghimus calchi corru.

20. Agus

S'iscena no mi paret tantu bella
ma tue Is scanu ite est chi mi ratas,
no m'astringhel ne cinta e ne bretella
faghes menzus tue si t'addatas,
deo l'apo connota verginella
ma tue verginella non l'agatas.
Ma tantu ja si idet caru Is scanu
chi meritas roba de segunda manu.

21. Scanu

Ma si suspetat già est mesu istranu
torrat a domo e bi naschet rissa,
Peppina astutu calu est Is scanu
las pensat totus in sa mente ti fissa,
menzus a domo bi enzal manzanu
a issu narali chi andas a missa.
E cand'intras a domo mi recreo
tando sa missa ti la canto deo.

22. Porcu

E gai am'a faghère un'ilfrasciu
e sa cosa già contat quasi iara.
Bos nalzo lscanu no est modellu 'e masciu
e no est chi est una prella rara,
ma su chi 'e mancu lu tenet in cara
totu in pius lu tenet in basciu.
Maridu meu mind'iscampet Deu
male in susu e in basciu peu.

23. Agus

Non ses mancu d'esponnere in piatza,
ca ses tropu cun sa conca liberi,
se cosas gai como ses in catza
e ti chilcas s'amante 'e Othieri,
ma si cheres cumpagnu 'e cussa ratza
tando debes andare a Ortueri,
ca in cussa bella idda ti nd'amentes
bi tenene su parcu 'e sos molentes.

24. Scanu

Ma cun s'amore brullare no b'ada
ca faghet parte de sos sentimentos.
Tue na' chi ti ses innamorada
eo ti penso in totu sos momentos,
ma bi devimus istare attentos
ca b'at perigulu 'e calchi fusilada,
e pro godere calch'ora serena
menzus c'andemas tando in domo anzena.

25. Porcu

Non nde timas fusilada caru amigu,
ca no at arrivare custa sera,
deo non t'amo da tempus antigu
ma de mi diveltire apo ispera.
Si bi l'aconcas faghimus un'intrigu
e a Brunu che zagamus in galera.
In cue zente gai si nde tratat
calchi masciu de abbrazare già l'acatat.

26. Agus

Como ti naro una cosa vera
Giuseppina e lassami s'ispantu.
Si a sa presone una preghiera

mi faghes deo no tenz'agguantu,
ma sa die chi intro in galera
bois duos sezi in su campusantu.
S'amore ostru finit a passare
prite bos ponzo ambos conc'a pare.

27. Scanu

O Peppina attenta ti fetas
no ti naro chi sia disperadu,
ma sas rejones ti cherzo narrer netas
prite sempre onestu so istadu,
c'apo intesu c'at fatu minetas
e i como so girende armadu.
Si no mi chilcat isse eo no lu toco
ma si mi chilcat peldeu lu oco.

28. Porcu

Tando ti lu do deo su permissu
ispèdilu a sa lestra a sa nue
e si sos contos faghimus in cue
cumbenit a lu etare in s'abissu.
E pensa prima chi ti ocat issu
ti cumbenit a lu ochire tue.
Si morit sa cosa no est interessante
issu in galera e deo senz'amante.

29. Agus

Ma proite no t'istas a sa muda
faghemi su favore Giuseppina,
si cheres baediche e mi saluda
e in s'istrada tua t'incamina,
ca no apo mai intesu una femina
chi est preghende a bessire fiuda.
Ma prima 'e agatares cuss'istima
soe cunvintu chi ti apico prima.

30. Scanu

Deo d'ingannu non nde chilco tramas
ca in vida so andadu sempre a filu,
ca so veru omine si m'amas
e i su chi ti naro amitimìlu,
ca una cosa tue narabbilu
como lu lassas proite no l'amas.
No creo chi ti fetat abbolotu

ca tantu podet capitare a totu.

31. Porcu

Finas a cue b'apo fatu pessu,
e cun tegul mi chelzo divertire,
ma una cosa paret de amitire
pensende a totu cantu s'interessu.
Si issu su divortziu at a petire
inari bi cheret po su processu,
e deo tribagliu no nde apo in cue
e tando sa moneda mi das tue.

32. Agus

Ses diventada un'ebba vitziada,
chi pagu a isprone an sempre puntu,
cun custu vagabundu de istrada
chi mai una meta at raggiuntu.
Sa mia isposa bella e amada
arrivada ja ses a bellu puntu,
a mi traigher'in custu comune
cun d'unu chi no andat mancu a fune.

33. Scanu

Cara Peppina a ti la narrer franca
amentadilu no so unu tontu,
sa parte mia bi la ponzo prontu
tue puru sas cascias spalanca,
prite andare bi podes in banca
ca mi l'al nadu chi b'azis su contu,
e gai umpis a manadal ricas
e si gai non faghes t'impicas.

34. Porcu

No mi piaghet lscanu cust'abboju,
deo in banca no mbi poto andare,
su contu meu no est unu poju
e in cue b'at pagu ite piscare,
ma maridu meu longu a tununare
cando mi asat m'inchintrat a s'oju,
e si a basare sighit ancora
timo chi sa pupia m'oghet fora.

35. Agus

Deo t'apo giuradu sentimentu

e ti nde tenzo ancora oe in die,
però ti fato un'avertimentu
e no lu les ne mancu rie rie,
narami como in custu momentu
o piantas a issu o puru a mie.
Narami cale ti leas de via
si restas o ti ch'ogo 'e d'omo mia.

36. Scanu

Ca chi cussu calasciu l'as serradu,
no nd'apo a restare deo afrantu,
nos arrangiamus gai cante e cantu
comente amus fatu i su passadu,
tue li naras chi m'as lassadu
e poi nol bidimus d'ogni tantu.
A sa cua no nos bidet nisciunu
e gai est cuntentu tiu Brunu.

37. Porcu

Jà ses un'ora chin cust'avolotu
signu bujiaca as ilboidada,
e como abberu ti apo connotu
ses Iscanu una conca brujiada.
De nou a Brunu li fato su votu
sa parte tua contat cancellada.
No ti chelz'ider dae oe in poi
e i su tema terminamus goi.

38. Agus

E so cuntentu si finida sie
gai resto cun s'anima serena.
Tue Iscanu fis fetende a mie
una ferida 'e dolore piena.
Ma Cristos perdonadu at a Maddalena
deo Giuseppina perdono a tie.
Ca ses pentida como mi lu nara
dendemi unu bellu asu in cara.

39. Scanu

E tando a mie mi negas s'afetu
e i como Peppina m'as delusu,
proite m'as imbrogliadu a deretu
e i s'amore nostru si est conclusu.
Gai ghi bos colchedas in su letu

e chi no bondes pesedas piusu.
Finende de amore ogni segnale
chi b'apat paga zente in funerale.

SA DUINA

1. Porcu

Ma lassamus sa morte e s'interru
Est ora de cantare sa duina

2. Agus

Deo in paradisu cun Giuseppina
Tue Iscanu pares in s'Inferru

3. Scanu

Ma boch'inserrene in gabbial de ferru
Si campades pro peus ruina

4. Porcu

A su tema serramus su calasciu
E da femina so torradu masciu

5. Agus

E tue Iscanu si cherel femina
Chilcadila puru in Othieri

6. Scanu

Ma deo ando a passu lizeri
Nde busco in montagna e in marina

7. Porcu

O una in Tonara nde preferi
Chi sia bella che una rejna

8. Agus

Però Iscanu s'amore e sentimentu
Lu chilcat sempre pero a pagamentu

9. Scanu

Ma deo ja tenzo ateru gosu
Tue penses a ti coiugare

10. Porcu

A mala gana tocat de pagare
Po no restare tropu a riposu

11. Agus

Deo ja l'ischis Iscanu chi so isposu
Ma tue pensa a ti la chilcare

12. Scanu

Ma da chi sel maridu as cunsideru
Pensa s'amante si bi est abberu

13. Porcu

Vai no at a suzzedes cussu dannu
Ma menzus a cambiare s'arrejionu

14. Agus

Si unu corru m'essit in su pannu
Fina a lu jugher ap'a esser bonu

15. Scanu

Fertu chi t'at a ponnere in affannu
Che raju chi falat pois de su tronu

16. Porcu

Ma lassade a banda sas ruinas
Final Mereu fit contra sal feminas

17. Agus

Ma si sunt totus che a tie Iscanu
Corrol no mi nde naschet de seguru

18. Scanu

Mi chi s'isposa si m'intrat in manu
Sos corrol gia ispuntan'in futuru

19. Porcu

E cussu no er misteru arcanu
Chi cando essit est appuntidu e duru

20. Agus

In domo mia finil de cumbatere
Ca da inie ti nde ogat atere

21. Scanu
No so in s'isetu 'e benner tue
Bruno a mi chircare una signora

22. Porcu
E da chi buscadu no nde as ancora
Permiti deo ti cunsize in cue

23. Agus
Tue che jughel sa conca in sa nue
Brinca brinca a correddu fora

24. Scanu
Deo totue mi abelzo istradas
E che passan bajanas e cojadas

25. Porcu
Bajanas e cojadas a lontanu
Timo che passet puru calchi manu

26. Agus
Ma custa discussione si tratenet
Restet d'ognunu cun cudda chi tenet

27. Scanu
E tue Porcu non faeddel gai
Ca femina no nd'as tocadu mai

SA BATORINA

1. Porcu
A la cantamus una batorina
Apo ascultadu custa peraula
E si su chi ses nende como er faula
Chi ti potas torrare in chisina
A la cantamus una batorina

2. Agus
Tando cantamos una batorina
Sa zente no est a s'amore contraria
Ma isperamos chi frimet s'aviaria
si nono est una bella ruina
Tando cantamos una batorina

3. Scanu

Tando cantamus una batorina
In s'iscenzia chi bi fetan proa
D'ogni tantu b'at una peste noa
Chi bi pensende a sa sede divina
E la cantamus una batorina

SA BATORETA

4. Porcu

A la cantamus una batoreta
De la curare a ci at pensat tatica
Ca fin'a oe in sa zon'asiatica
Ogni die el fatende peta
A la cantamus una batoreta

5. Agus

Tando cantamos una batoreta
Però sa timòria est sempre cudda
Ca como paret sa peta `e sa pudda
Chi no est comente a prima bona e neta
Tando cantamos una batoreta

6. Scanu

Tando cantamus una batoreta
Ma a Mereu li tenzo istima cara
E che issu isperemus in Tonara
Chi che nascat un'ateru poeta
E la cantamus una batoreta

SA PAESANA

7. Porcu

A la cantamus una paesana
E cussu bona sorte chi lu pascat
Cantu prima inoghe chi nde nascat
E boghet fama in sa terra isolana
A la cantamus una paesana

8. Agus

Tando cantamos una paesana
Pro diventare che issu unu re
Est a bufare s'abba `e Galusè

Ca el de poesia una funtana
Tando cantamos una paesana

9. Scanu

Tando cantamus una paesana
Cussa funtana l'at dadu recreu
E at da chi cantadu b'at Mereu
No fit tzertu su cantu `e sa rana
E la cantamus un paesana

SA FURISTERA

10. Porcu

A la cantamus una furistera
De lu narrel mi leo su permissu
Nascat ma non siat che a issu
E de imbezare tenzat sa manera
A la cantamus una furistera

11. Agus

Tando cantamos una furistera
Giuseppe a Deul grascia li pedit
Ca timet che a Mereu li suzedit
No nd'at a fagher longa carriera
Tando cantamos una furistera

12. Scanu

Tando cantamus una furistera
Manc'e sa morte at tentu timores
E da sor ricos e sos impostores
Ses dispedidu in bona manera
E la cantamus una furistera
SA BUSCHISTRIGLIA

13. Porcu

A la cantamus una buschistriglia
Mereu lu el mastro elezidu
sa fama sa morte no at bochidu
E cun issu apeltu sa puntiglia
A la cantamus una buschistriglia

14. Agus

Tando cantamos una buchistriglia
Salvadore iscurtami a pianu
Issu cantadu at a Lisa Iscanu
No at a esser de sa tua famiglia
Tando cantamos una buchistriglia

15. Scanu
Tando cantamus una bruschistriglia
Sa cantone ja l'el bessida bella
Ma no fit de sa mia parentella
Atera ratza aiat in conchiglia
e la cantamus una bruschistriglia

SA NOITOLA

16. Porcu
A la cantamus una noitola
Però s'associatzione no est a cua
E sigat sempere in s'opera sua
Difundende de Mereu s'iscola
A la cantamus una noitola

17. Agus
Tando cantamos una noitola
S'associatzione si gussu at a usu
Si fetant sempre cosal de pius
E non si frimen cun sa gara sola
Tando cantamos una noitola

18. Scanu
Tando cantamus una noitola
S'associatzione interessante
E d'ognunu bi collabore costante
Tenzat fama in sa terra sardignola
E la cantamos una noitola

SA TARANTELLA

19. Porcu
Finìmula cun d'una tarantella
De Mereu in totue si mentovede
E sa festa pro issu si rinnovede

D'ogni annu piul manna e piul bella
E la finimus cun sa tarantella

20. Agus

Tando si finit cun sa tarantella
Mai sutzedat pena senna dannos
E a cantare finas a chent'annos
De fronte ai custa bella comunella
E si finit cun custa tarantella

21. Scanu

E la finimus cun sa tarantella
E bo la canto preghende a Peppinu
Chi si podet da su chelu divinu
Beneigh'a d'ogni ostra parentella
E la finimus cun sa tarantella

SA DISPEDIDA

Porcu

Tonara oe amentas a primore,
un'astru sardu de sa poesia.
De su Parnasu delicadu fiore
ch'in sinu tou at tentu natìa.
Iscritore e improvisadore
cun duos donos e no un'ebbìa.
Poeta raru in mesu `e s'amore
mastru distintu in mesu a s'angustìa.
De sentimentu funtana pius digna,
faru atzesu in sa nostra identidade
cantu lassadu no s'at in cunsigna.
Pro chi sende in sa giovane edade
tentu at sorte crudele e maligna.
Meritat fama pro s'eternidade.
Deo ringrazio ca m'atzis amissu,
cun cust'umile mia facultade
custu die pro onorare a issu.
Pro calchi errore fatu m'iscusades

e in bona permanentzia restades.

Agus

Non sun totu sas biddas chi ana tentu
Tonara che a tie s'altu onore,
de unu fitzu cun custu talentu
poeta de su massimu valore,
chi at pienu `e fama e de lugore
sas bellas terras de su Gennargentu.
Cun poesia fata `e sentimentu
colorida che su menzus fiore.
Però sa sorte ingrata e maligna
non de l'at tentu meda de rispetu
e allutadu at tota sa Saldigna.
Ma s'amore pulidu cun s'afetu
chi cust'isula l'at dadu in cunsigna
at a restare sempre in d'ogni tretu.
E tue Tonara cust'amore netu
chi as pro issu non lu perdas mai.
Sighindelu a onorare sempre gai
cun costantzia meda e cun fortuna
astringhinde sas manos a una una
a sos istranzos cun sos paesanos.
Pro bos augurare chi restedas sanos
prima `e ennere vida sos concluos
e Mereu sos paesanos suos
chi nd'est de custu logu ognunu invidiosu.
Ma prima chi divente noiosu
bos saludo e sa gara sos concluos
istades bos in paghe e adiosu.

Scanu

Mereu cun poeticos vigores,
distintu s'est cun abilitade
e pro chi vivet in sa comodidade
ischieradu s'est cun sos minores.
De sos potentes no tenet timores
e los invitat a sa paridade,
ca ue b'at non cheret richesa e ne povertade
ca sa vida at ateros valores.

De ipocritas su mundu est pienu,
si torrat at a ripiter ancora
proite custu mundu est tropu feu.
Però como mi l'imagino serenu
ca onorende lu est sa sua dimora
at a essere in festa in s'Empireu.
Li ses rinnovedas custa festa digna
ca onore ja bon dat fatu a rios.
E innanti de bos dare sos adios
s'abratzu meu bol lasso in cunsigna.